

Ni Pangulong
Thomas S. Monson



Ang Ginuo Nagakinahanglan sang mga Misyonero

Sang nagligad nga Oktubre sa pangkabilugan nga komperensya nagpanawagan ako para sa dugang nga mga misyonero. Ang tagsa ka takos, makasangrang nga lamharon nga lalaki dapat maghanda sa pag-alagad sang isa ka misyon. Ang subong nga pag-alagad isa ka tulumanon sang priesthood—isa ka obligasyon nga ginapaabot sang Ginuo sa aton nga ginbugayen sing tuman kadamo. Mga young men, ginalaygayan ko kamo nga maghanda para sa pag-alagad bilang isa ka misyonero. Magpabilin kamo nga matinlo kag putli kag takos sa pagrepresentar sang Ginuo. Tipigi ang inyo ikaayong-lawas kag kusog. Magtuon sang balaan nga mga kasulatan. Kon sa diin nga may yara, magpartisipar sa seminary kag institute. Magtuon agud masayran ang pang-misionaryo nga libreto *Preach My Gospel*.

Mga sister, bisan wala kamo sang priesthood nga obligasyon pareho sang young men nga mag-alagad bilang full-time nga mga misyonero, nagahimo man kamo sang bilidhon nga kontribusyon bilang mga misyonero, kag ginaagda namon ang inyo pag-alagad.

Sa may-edad na gawa nga mga kauturan sang Simbanan, ginapahanumdoman ko kamo nga ang Ginuo nagakinahanglan sang madamo pa gid kaayo sa inyo agud mag-alagad bilang full-time nga mga misyonero. Kon

wala pa kamo sa tion sang kabuhi agud mag-alagad sang isa ka misyon bilang mag-asawa, ginapaisog ko kamo nga maghanda na sa karon para sa adlaw nga, sa itugot sang inyo mga kahimtangan, kamo kag ang inyo asawa ukon bana sarang maghimo sini. Pila lang ang mga tinion sa inyo mga kabuhi nga maangkon ninyo ang matam-is nga espiritu kag kalipay nga nagaabot gikan sa paghatag sang full-time nga pag-alagad sing upod sa buluhaton sang Agalon.

Karon, ang pila sa inyo mahimo nga duna nga mahuluy-on ukon nagakabig sang inyo mga kaugalingon nga kulang ang ikasarang sa pagbaton sang tawag nga mag-alagad. Dumdumon ninyo nga ini buluhaton sang Ginuo, kag kon nagaalagad kita sa Ginuo, nagakabagay kita sa bulig sang Ginuo. Ang Ginuo magapabakod sang likod agud madala ang palas-anon nga ginabutang diri.

Ang iban, bisan pa nga takos sa pag-alagad, mahimo magbatayag nga may yara sila sing mas importante nga mga prayoridad. Madumduman ko sa gihapon ang promisa sang Ginuo: “Kay ang mga nagapadungog sa akon padungan ko” (1 Samuel 2:30). Wala sa aton sang makapasidungog sa aton Amay nga Langitnon kag aton Manluluwas sing labi pa sangsa pag-alagad bilang isa ka maukod, maluluy-on nga misyonero.

Isa ka halimbawa sang subong nga pag-alagad amo ang eksperiensya sa misyon nanday Juliusz kag Dorothy Fussek, nga gintawag sa pag-alagad sang isa ka misyon sa Poland. Si Brother Fussek natawo sa Poland. Makahambal sia sang lengguahen. Palangga niya ang mga tawo. Si Sister Fussek natawo sa Ingglatera kag diutay lang ang iya nahibaloan parte sa Poland kag wala gid parte sa mga pumuluyo sini. Nga nagasalig sa Ginuo, ginhimo nila ang ila buluhaton. Ang hilikuton nangin mabudlay, ang ila katungdanan tuman ka daku. Ang misyon wala pa sadto nga panahon naestablisar sa Poland. Ang takay nga ginhatag sa mga Fussek amo ang paghanda sang alagyan agud nga ang isa ka misyon sarang maestablisar.

Gintalawan bala sang buot sanday Elder kag Sister Fussek bangod sang kadakuon sang ila buluhaton? Wala gid. Nakahibalo sila nga ang ila tawag halin sa Dios. Nagpangamuyo sila para sa Iya diosnon nga bulig, kag ginhatag ang ila mga kaugalingon sing bug-os sa ila buluhaton.

Sa nagkaigo nga tion sanday Elder Russell M. Nelson sang Korum sang Napulo'g Duha ka mga Apostles; Elder Hans B. Ringger, sadto sang Seventy, kag ako, nga gin-updan ni Elder Fussek, nakikita sa ministro sang kahiwatan-pang-relihiyon nga si Adam Wopatka sang gobyerno sang Poland. Nabatian namon sia nga nagsiling, "Ginaabi-abi namon diri ang inyo simbahan. Mahimo kamo magpasad sang inyo mga bilding; mahimo kamo magpadala sang inyo mga misyonero. Ining tawo," nga nagatudlo kay Juliusz Fussek, "nag-alagad sing maayo sa inyo simbahan. Inyo gid mapasalamatan ang iya ehemplio kag iya hinimoan."

Kasubong sang mga Fussek, himuong naton ang dapat naton himuong sa buluhaton sang Ginuo. Dayon sarang naton, upod kanday Juliusz kag Dorothy Fussek, suliton ang Salmo:

"Ang akon bulig nagagikan sa Ginuo, nga naghimo sang langit kag duta.

"... Ang nagabantay sa imo indi pagtuyhon.

"Yari karon, ang nagabantay sang Israel indi tuyhon ukon magtulog" (Salmo 121:2–4).

PAGTUDLO GIKAN SA SINING MENSAHE

Ang *Teaching, No Greater Call* nagasiling: "Magpaambit sang isa ka personal nga eksperiensya parte sa

kon paano ang pagpangabuhi sang isa ka prinsipyo sang ebanghelyo nagbugay sang inyo kabuhi. Agdaha yadtong inyo ginatudloan nga magpaambit sing malipot lang sang ila kaugalingon nga mga eksperiensya" ([1999], 159). Basaha ining mensahe kag dayon pangabaya ang mga miyembro sang pamilya sa paghingalan kon sin-o base sa hambal ni Pangulong Monson ang dapat mag-alagad sang isa ka misyon. Magpaambit sang personal nga mga eksperiensya nga naangkon ninyo ukon sang iban sa pag-alagad bilang full-time nga mga misyonero. Ukon magpaambit sang inyo mga plano sa pag-alagad bilang isa ka misyonero sa palaabutan. Pangabaya ang mga miyembro sang pamilya nga magpaambit sang ila mga plano kag positibo nga mga eksperiensya.

LAMHARON

Magbisikleta Pakadto sa Palaabutan

Nanday Peter Evans kag Richard M. Romney

Madamo sang young men ang nagahanda sa pinansyal nga paagi agud mag-alagad sang isa ka misyon. Sa Aprika kabahin sinang pagpanghanda amo ang pagpangita sing bastante nga kuwarta agud makagawad sang pasaporte. Si Sedrick Tshiambine nakatipon sang iya ginkinahanglan sa isa ka matinugahon nga paagi: sa pagbaligya sang mga saging gikan sa likod sang isa ka bisikleta.

Si Sedrick nagapuyo sa Luputa, sa Demokratikong Pungsod sang Congo [Democratic Republic of Congo]. Isa sia sang 45 ka young men sa distrito sang Luputa nga nagatrabaho agud makasupot sang kuwarta para sa isa ka pasaporte agud makalakat sa isa ka misyon. Sa DR Congo ang isa ka pasaporte nagabili sang \$250, nga mga duha-ka-bahin sang tatlo (two-thirds) sang bili sa pagpasad sang isa ka balay.

Apang si Sedrick wala gintalawan. Ginganar niya ang iya kuwarta para sa misyon paagi sa pagbisikleta sang 15–30 kilometros (9–19 ka milya) gikan sa Luputa pakadto sa magagmay nga mga baryo sa diin iya ginabakal ang mga saging, dayon sa pagbisikleta pabalik-tabok sa mainit kag hilamonon nga patag sang Aprika nga ang iya bisikleta puno sang mabug-at nga mga prutas nga ibaligya sa siyudad. Tagsa ka semana

nagabiyahen sia sing mga 180 ka kilometro (112 ka milya) sa balason nga mga dalanon, kag kis-a lang gid nga ang indi balanse nga karga nangin rason sang pagkatumba.

Sa iya paghimud-os si Sedrick nagganar sing mga \$1.25 sa isa ka semana, ukon \$65.00 sa isa ka tuig. Nakalab-ot sing apat ka tuig para makasupot sia sing bastante nga kuwarta agud makagawad sang iya pasaporte, apang karon nakahibalo sia nga ang iya palaabuton magalakip sang isa ka full-time nga misyon bangod handa na sia sa pinansyal nga paagi sa pagsabat sang tawag nga mag-alagad.

MGA KABATAAN

Magahanda Ako Samtang Lamharon Pa Ako

Agud mabuligan ang kabataan nga madumduman ang tawag ni Pangulong Monson sa paghanda sa pag-alagad sang isa ka misyon, planohi ang paghimo

sang isa ka sertipiko nga gamit ang mga pulong sa idalom para pirmahan sang inyo kabatan kag tipigan bilang pahanumdom, ayhan sa ila dingding ukon sa ila journal.

MAGAHANDA AKO

Si Pangulong Thomas S. Monson nagtawag sa akon nga maghanda sa pag-alagad sang isa ka misyon. Ako:

- Magapabilin nga matinlo kag putli kag takos sa pagrepresentar sang Ginuo.
- Magatipig sang akon ikaayong-lawas kag kusog.
- Magapangamuyo kag magatuon sang balaan nga mga kasulatan.

Magahanda ako sa pag-alagad sang
isa ka misyon.

(pirma)



Ang Kasaysayan kag Panublion sang Relief Society

Tun-i ining materyal kag, sa nagakaigo, hambali ini upod sang mga sister nga inyo ginabisita. Gamita ang mga pamangkot agud buligan kamo sa pagpabakod sang inyo mga sister kag himuong ang Relief Society nga aktibo nga bahin sang inyo mismo kabuhi.

Si Eliza Snow nakadumdum kay Propetang Joseph Smith nga nagatudlo nga “bisan pa nga ang ngalan nga [Relief Society] gikan sa makabag-o nga panahon, ang institusyon dumaan ang ginhalinan.”¹

Ang Amay nga Langitnon kag ang Iya Anak, nga si Jesucristo, nagbisita kay Joseph Smith kag, paagi sa iya, ginpanumbalik ang kabug-osan sang ebanghelyo sa duta. Ang Relief Society kabahin sinang pagpanumbalik. Ang organisasyon sang Simbahon wala nakumpleto tubtob nga ang mga utod nga babayi naorganisa sa isa ka katilingban.²

Sa maabot nga mga binulan, ang tagsa ka Mensahe sa Visiting Teaching magahatag sa aton sang kahigayunan nga magtuon sing dugang parte sa kasaysayan sang Relief Society kag sang iya sini bahin sa ginpanumbalik nga ebanghelyo. Sa madamo nga mga rason, ang paghangop sang aton kasaysayan indi lang importante kundi *kinahanglanon*.

Una, ang paghangop sang aton kasaysayan nagaduso sa aton nga mangin ang Diosnon nga mga babayi nga kinahanglan naton mangin. Paagi sa pagsunod sang mga ehemplio sang dungganon nga mga babayi nga Santos sa Ulihing mga Adlaw, makatuon kita gikan sa nagliligad kon paano atubangon ang palaabuton.³

Ikaduha, ang aton kasaysayan nagatudlo nga ang amo man nga mga prinsipyo nga nagluntad sa una nga Simbahon amo ang aton salandigan nga mga prinsipyo sa karon. Ining ihibalo kag ang aton mga katuyuan—sa pagpatubo sang pagtuo kag personal nga pagkamatarong, pagpabakod sang mga pamilya kag mga panimalay, kag pagbulig sa mga yadtong nagakinahanhanglan—nagaangot sang aton nagligad sa aton karon panahon.

Ikatlo, sa aton paghatag-bili sa aton kasaysayan, sarang naton mapaaabit sing mas maayo ang aton espirituhanon nga panublion. Si Pangulong Henry B. Eyring, Unang Manuglaygay sa Unang Panguluhan, nagsiling: “Ginapasa ninyo ang panublion sa inyo pagbulig sa iban nga mabaton ang dulot sang paghigugma sa isigkatawo (charity). . . . Ang kasaysayan sang Relief Society ginsulat sa mga tinaga kag mga numero, pero ang panublion ginapasa tagipusuon sa tagipusuon.”⁴

Sa katapusan, ang paghangop sang aton kasaysayan nagabulig sa aton nga mangin mapuslonon nga bahin sang palaabuton sang Relief Society. Si Pangulong Spencer W. Kimball (1895–1985) nagpaathag, “Nakahibalo kita nga ang mga babayi nga may madalom nga pagtamod sa nagliligad magatinguha sa

pagpatigayon sang isa ka matarong nga palaabuton.”⁵

Julie B. Beck, pangabilugan nga pangulo sang Relief Society.

Gikan sa Balaan nga mga Kasulatan

Ester 9:28–29; Mga Taga-Roma 16:1–2; Alma 37:8; Moroni 7:45–47

Gikan sa Aton Kasaysayan

“Ang Relief Society amo ang katilingban sang Ginuo para sa mga babayi.”⁶ Sa iya katungdanan bilang isa ka propeta, ginpasad ni Joseph Smith ang Relief Society sang Marso 17, 1842. Ang magamay, magkatuhay nga grupo sadtong una nga miting gintapuan sang mga babayi nga may dedikasyon, kasubong sang mga utod nga babayi sa Relief Society sa karon. “Ang pinakahubin amo ang tatlo ka mga dalagita, kag ang pinakatigulang, isa ka babayi nga singkwentahon ang edad. Napulo’g isa sa mga babayi ang may bana, duha ang balo, anum ang dalaga, kag ang estado sang isa wala mahibal-an. Ang ila edukasyon kag personal nga mga kasaysayan tuman nga magkatuhay, kasubong man sang ila pinansyal nga mga kahimtagan. Ang ila mga kinatuhan labi nga nangin hilmunon samtang ang mga miyembro sang katilingban nagpadyon sa pagdamo, pero nagpabilin kag nagpadayon sila nga nagahiusa.”⁷

MGA TANDA

1. Eliza R. Snow, "Female Relief Society," *Deseret News*, Abr. 22, 1868, 81.
2. Tan-awa sa *Teachings of Presidents of the Church: Joseph Smith* [Mga Panudlo sang mga Pangulo sang Simbahon: Joseph Smith] (2007), 451.
3. Tan-awa sa L. Tom Perry, "The Past Way of Facing the Future," *Liahona*, Nob. 2009, 73–76.
4. Henry B. Eyring, "The Enduring Legacy of Relief Society," *Liahona*, Nob. 2009, 124–25.
5. Spencer W. Kimball, "Privileges and Responsibilities of Sisters," *Ensign*, Nob. 1978, 104.
6. Spencer W. Kimball, "Relief Society—Its Promise and Potential," *Ensign*, Mar. 1976, 4.
7. Jill Mulvay Derr, Janath Russell Cannon, and Maureen Ursenbach Beecher, *Women of Covenant* (1992), 28.

Ano ang Sarang Ko Mahimo?

- 1.** Ano ang sarang ko mahimo agud mabuligan ang mga utod nga babayi nga akon ginabisita nga makabaton sang dulot sang paghigugma sa isigkatawo?
- 2.** Ano ang sarang ko masuguran nga himuong sini nga bulan agud makabulig sa pagpatigayon sang isa ka matarong nga palaabuton para sa akon kaugalingon? para sa akon pamilya? para sa iban?

Para sa dugang nga impormasyon, mag-log on sa www.relfiefsociety.lds.org.